

# Art figurativ ella Fermata

L'exposiziun d'art ella Fermata a Falera ha aviert las portas

■ (anr/ac) Per la tschunavla ga porscha la Fermata a Falera ad artistas ed artists derivonts dalla regiun ina plattafuorma per presentar lur obras durant la stagiun d'unviern. La sonda vargada han ils organisaturs dall'exposiziun Verena e Paul Casutt envidau alla vernissascha. A caschun dalla vernissascha dalla sonda vargada ella Fermata a Falera ha il suprastont communal Orlando Steiner explicau la filosofia dall'exposiziun organisada da Verena e Paul Casutt. Sper l'intenziun da presentar las obras ad in publicum pli vast persequiteschan els la finamira da porscher ad artistas ed artists derivonts dils treis impurtonts intschess romontschs ina plattafuorma. Duront la stagiun d'unviern exponan Elisa Bernasconi, Isabella Portmann, Mario Bergamin ed Andreas Anderegg lur obras al publicum dalla Fermata. Verena Casutt ed Orlando Steiner han presentau artistas ed artists a caschun dalla vernissascha. Bernasconi ei carschida si a Castrisch e viva e lavura actualmein a Remetschwil e posseda leu in agen atelier. Ella ha schaffiu in'atgna tecnica da malegiar buca talmein derasada. Portmann ei carschida si a Cuera e davart da sia mumma posseda ella ragischs a Glion cun ligioms familiars a Falera. Sper igl atelier a Horgen nua che Portmann viva meina ella aunc in'atgna galleria a Cuera. Anderegg che viva actualmein a Fidaz ei carschius si a Clastra. En siu atelier a Fidaz sededichescha igl artist a sias sculpturas da crap. Sper la clamada dad inschignier dall'elavuraziun da datas sefatschenta Anderegg cun la fotografia. Bergamin ei derivonts da Valbella ed ei da casa a Lai nua ch'el sededichescha al malegiar e sias obras pendan leu era en l'atgna galleria ed entginas las jamnas proximas ella Fermata.



Verena Casutt ed Orlando Steiner han presentau artistas ed artists presents cun diversas obras all'exposiziun actuala ella Fermata a Falera.

FOTO A. CADONAU

Artistas ed artists han a caschun dalla vernissascha rendiu attent a lur motivaziun e tecnica da lur lavur artistica e plidentau per part las obras exponidas ella Fermata.

## Ina completaziun ideala

Steiner ha valetau l'exposiziun ella Fermata sco completaziun ideala dall'ulteriura puschida dalla Fermata cun concerts, cumediants e musicals per affons. El ha fatg attent all'impurtonza di gl art e dalla cultura en general per Fa-

lera e valetau quella sco part dall'identitad dalla vischnaunca. Ed il center da cultura, la Fermata, tenor il suprastont communal in liug da sentupada ed ispiraziun. La presentaziun dad artistas ed artists e las explicaziuns individualas dils expositurs ein vegnidas enramadas musicalmein dalla solista cun flauta traversa, Alexa Deplazes. E secapescha che la vernissascha ha anflau sia cuntinuaziun cun in puschegn e divers discuors denter visitadras e visitaders ed artistas ed artists.